

金剛經講義擷錄序

語云：人同此心，心同此理。又云：心是經綱，經是心綱。益此金剛般若尊經，人人心中本具，個個念裏不無。然自無始以來，即被無明煩惱所覆，妄想執著蔽錮，隱而不顯。沉淪於心海源底，枉受長劫輪迴，備嘗生死眾苦。若不啟發，永無出期。倘欲開顯此本具清淨心性，正因須藉聞法淨緣。因緣具足，乃可顯現。譬如自家衣裳，摩尼寶珠，一經覓得，再加洗滌，仍然晶瑩光潔，圓滿無缺，而不由他得。亦如長睡既醒，恍然覺悟，生死塵勞，猶如昨夢。是故我本師釋迦菩薩於因地中，為求生滅滅己等八字偈以捨身，惠能六祖在凡俗時，祇聞無住生心兩句經而開悟。自是禪宗諸祖，代代傳授此經，法門四眾，人人發心誦持。由之而起信，生解開悟，得証者多似恆沙，曷可勝數。益震旦一方眾，自古以來多為大乘根器。先經舜堯、禹、湯、文武、周公、及孔孟、老莊、諸明王聖賢，倡導宇宙人生之真理哲行於前，由唯經唯一，允執厥中而修率性之道，求致中和。以明明德，親民度眾，止於至善，由此大乘思想種子佈植人心，復經代代孕育，世世流傳，久之因緣淳熟，而佛法傳入中華，於是更知一真法界，普遍十方，常住真心，豎窮三際，緣起性空，性空緣起。五蘊諸法即是實相。理具事造，二而不二，現象本體，不二而二。如是大乘佛法，由傳譯弘揚，而研習教觀。及禪宗興起，傳佛心印，猶如畫龍點睛，騰雲佈雨；然仍須依解起行，

藉教觀心。是以達磨初祖，甫來斯土，即授楞伽。及至五祖，改傳金剛。以是經與東土眾生最為契機，而且有緣也。自唐宋以來，著書釋義者，不下千家。而於現代諸注疏中，以江味農居士講義，註釋闡理，頗為周備，為以文帙浮繁，於今工業社會中學修之士讀之，甚難終篇領其要旨。香江寬郁居士有鑑於此，遂於念佛之餘，恭聞此經，擷錄精華，彙集一冊，以供法門四眾能於暫短時間，得解全經義理，更由解義而起觀行，由觀行而得禪旨，由禪旨而融會於一句阿彌陀佛，**萬德洪名中**，庶幾能得永明延壽大師禪淨雙修之妙訣，於現生中則諸障蠲除，福慧增長。一旦淨緣成熟，則往生極樂，親睹彌陀，忍証無生，廣度群萌，同証菩提，如操左卷也。是為之序。

中華民國六十三年四月八日於鯤南水里蓮因梵室 長白沙門懺雲